

## Weckherlin, Georg Rodolf: Ode (1641)

- 1 Ojhr krumme/ schlimme sehlen/
- 2 Wolt jhr euch
- 3 Laster-reich
- 4 Nu mit dieser welt vermählen?
- 5 Bochet nicht auff ewre stöll/
- 6 Dan die welt nur eine Höll/
- 7 Euch zu martern vnd zu quälen.
  
- 8 Wollet jhr ein weil nu leben
- 9 Nach gebühr/
- 10 So solt jhr
- 11 Alß bald nach dem himmel streben:
- 12 Ist der himmel euch nicht lieb/
- 13 So seit jhr nicht wehrt/ jhr dieb/
- 14 Daß er euch sein liecht gegeben.
  
- 15 Lasset euch zu hertzen gehen
- 16 Was für frayd/
- 17 Was für layd
- 18 Jmmer in der welt zusehen:
- 19 Kan ein mensch auff disem Meer
- 20 In so vieler vbeln heer
- 21 Sicher vnd forchtloß bestehen!
  
- 22 Biß in das grab von der wiegen
- 23 Muß alhie
- 24 Vnder müh
- 25 Vnd ellend der mensch sich biegen:
- 26 Dan anfechtung/ Creutz vnd noht
- 27 Jhn biß in den bitteren tod
- 28 Stehts verfolgen vnd bekriegen.
  
- 29 Auch ist sein geburth so kläglich

30 Daß die plag/  
31 Mit dem tag  
32 Gleich anfangend/ kaum erträglich:  
33 Seine schwachheit vnd der schmerz/  
34 Tödtend seiner Mutter hertz/  
35 Seind empfindlich vnd vnsäglich.

36 Wan durch schmerzen tieff empfunden  
37 Er voll pein  
38 Schwach vnd klein  
39 Die geburth nu vberwunden:  
40 Wirt Er seinem stand gemäß/  
41 Als ein vbelthäter böß  
42 Eingewicklet vnd gebunden.

43 Wie oft muß/ jhn zugeschaigen/  
44 Jhm mit fug  
45 Ohn verzug  
46 Seine Säugam hilff erzaigen;  
47 Vnd den säugling von dem wust  
48 Reinigend/ mit bloser brust  
49 In der grösten kältin säugen.

50 Nemend jhn bald auff bald nider/  
51 Sunst hilffloß/  
52 Auff der schoß  
53 Wieget sie jhn hin vnd wider:  
54 Biß Er/ weil jhr sorg vnd müh  
55 Reibet seine bein vnd knüe/  
56 Störcket seine schwache glider.

57 Fanget Er dan an zugehen/  
58 Auch die sprach  
59 Nach vnd nach  
60 (blöd vnd lisplend) zuverstehen:

61 Ist sein gang vnd seine bitt  
62 Halbe wort vnd halbe tritt/  
63 Schwach zu reden/ schwach zu stehen.

64 Seine kräfte mit den jahren/  
65 Seine witz/  
66 Seine hitz/  
67 Seine arbeit/ müh/ gefahren/  
68 Nemen mit einander zu/  
69 Allein nimmet ab die ruh/  
70 Nichts kan jhn für layd bewahren.

71 Alß bald seine tag nu blühen  
72 Kan sein muht  
73 Sich der wuht  
74 Seiner jugent nicht entziehen;  
75 Groß ist dan sein vnbestand/  
76 Vnd er felt in dise schand  
77 Wan er will von jener fliehen.

78 Spihlend mag Er sich wol vben  
79 Weil Er noch  
80 Ohn ein joch;  
81 Aber jhn mehr zu betrieiben  
82 Reuttet jhm auff einmahl auff  
83 Aller lastern grosser hauff  
84 Biß daß er sich muß verlieben.

85 Alß dan vnder Amors wafen  
86 Taub vnd blind  
87 Wie ein kind  
88 Könden jhn zway augen strafen:  
89 Hofnung/ trost/ wollust/ genuß/  
90 Forcht/ verzweyflung/ zorn/ verdruß/  
91 Wollen jhn nicht lassen schlafen.

92 Kan er dises vberwinden/  
93 Findet Er  
94 Noch vil mehr  
95 Trübsal vnd vnglick dahinden:  
96 Ehrgeitz/ geltgeitz/ vbermuht/  
97 Hader/ händel/ zanck vnd wuht  
98 Wollen jhn zu schinden binden.

99 Kommet Er dan fortgegangen  
100 Daß das glick  
101 Vnd die strick  
102 Aller laster jhn nicht fangen:  
103 Wirt Er auß der jugent saal  
104 In der alten leut spital  
105 Schlim vnd liederlich empfangen.

106 Dan da kommen auffgezogen  
107 Kalte Flüßsz  
108 Für die küßsz  
109 Die jhn vnlangst jung betrogen:  
110 Zittrend werden händ vnd füß/  
111 Das gicht/ zipperlin vnd grüß  
112 Machen jhn krumb vnd gebogen.

113 Vnd wan schon das Alter ehrlich/  
114 Ist die ehr  
115 Jhm doch schwer/  
116 Weil jhm alles gantz beschwerlich:  
117 Seine zähn nu fallen auß/  
118 Haupt vnd hertz voll schnee vnd grauß  
119 Mahlen alle ding geföhrlich.

120 Ach wie langsam Er nu schreittet/  
121 Weil die buß

122 Auff dem fuß  
123 Folgend allzeit jhn bestreittet:  
124 Alle hofnung ist dahin/  
125 Ach vnd weh ist sein gewihn/  
126 Biß daß jhn der Tod erbeuttet.

127 Wa/ wie/ wan er auch mag leben  
128 Jung vnd alt/  
129 Warm vnd kalt/  
130 Jhn die kranckheiten vmbgeben:  
131 Schwachheit/ sorgen/ falsche freind/  
132 Lügen/ neyd/ verleumbdung/ feind/  
133 Jhm verdrüßlich wider-streben.

134 Wie ein vogel durch sein fliegen  
135 Wie ein pfeyl  
136 In der eyl  
137 Leichtlich kan das aug betrüegen:  
138 So schnell ist des menschen haab/  
139 Vnd sein schrit zu seinem graab  
140 Ist nicht weit von seiner wiegen.

141 Endlich muß er sein vermögen  
142 Als den raub  
143 In den staub  
144 Mit dem körper niderlögen:  
145 Also endet nu das spihl/  
146 Daß weder lützel noch vihl  
147 Kan jhn/ kan er nu bewögen.

148 Wan man dan nicht kan verneinen  
149 Daß allhie  
150 Taussent müh  
151 Wider vns sich stehts aufleyen:  
152 Solten wir von hertzen grund

- 153 Vnser ellend alle stund  
154 Nicht beklagen/ vnd beweinen?
- 155 Kan vns aber nichts klug machen/  
156 Sondern wir  
157 Ohn gebihr  
158 Wollen lachen diser sachen:  
159 Ach! so lachet reich vnd arm/  
160 Lachet/ daß es Got erbarm/  
161 Ewers ellends selbs zu lachen!

(Textopus: Ode. Abgerufen am 23.01.2026 von <https://www.textopus.de/poems/18998>)